

concidit. Hengistus enim, cum Britannos è Cantio omnino exturbare in animo haberet, maximique sua interesse existimaret, si majoribus copiis turmas adaugeret; Ællam è Germania cum magna Saxonum manu evocavit. Qui dum magno impetu Anderidam hanc oppugnaret, Britanni è sylva proxima insidiantes, ita eum exagitarunt, ut cum tandem post multas ultro, citroque illatas clades, partitis copiis, & Britannos in sylvis fudisset, eodemque tempore in oppidum irrupisset, ita ad vindictam barbari animus exarsit, ut occisis incolis funditus everterit. *Locus vero desolatus multis post seculis transeuntibus*, (ut inquit Huntingdonensis) ostendebatur, donec sub Edwardo Primo fratres Carmelita è Carmelo Palestina recens profecti, qui solitaria quærebant loca, hic monasteriolum ex impenis Thom. Albugeri militis posuerint, oppidumque statim enatum, quod ratione veteris oppidi diruti, *Nexenden*, id est, *Novum in valle oppidum*, dici coepit. *Rother* flumen inferius dispersitis aquis insulam *Oxney* gramine luxuriantem amplectitur, & prope ostium *Apuldore* habet, ubi piratica Danorum & Normannorum colluvies quæ sub Hastings Gallica littora infestaverat, prædis onusta terram conscendit, castrumque erexit, quos tamen Ælfredi Regis virtus ad pacis condiciones compulit.

Oxney.
Apuldore.

Res pan-
naria pri-
mum in
Anglia.

Iuxta in sylvestri regione sunt *Cranbroke*, *Tenterden*, *Benenden*, & alia vicina oppida, in quibus lanificii, sive rei pannaria laus inprimis floruit jam inde ab Edwardi III temporibus, qui propositis præmiis, & plurimis concessis immunitatibus Belgas in Angliam anno regni sui decimo evocavit, uti nostros artem illam panni lanei contexendi edocerent, quæ hodie inter Reip. nostræ columnina merito numeratur.

Comites
Cantii.

Nunc ut Cantii Comites suo ordine percenseam, omisis Saxonibus Godwino, & aliis, qui non hæreditarii, sed officarii Comites erant) Odo uterinus Guilielmi Primi frater, primus habetur è Normannico sanguine Cantii Comes, simulque Bajocensis Episcopus, vir ingenio pravo, turbidoque, & rebus novandis semper intento, unde post gravissimam, quam concitavit seditionem, suis sedibus, & fortunis in Anglia à nepote Guilielmo Rufo ejectus. Deinde cum Stephanus Angliæ usufructuarius bellicosos homines beneficiis sibi astringeret, Guilielmum Ipresem Flandrum eo honore exornavit, qui *violentus Cantii incubator*, ut Fitz-Stephanus vocat, cum lachrimis emigrare ab Henrico Secundo coactus. Henrici etiam II filius, quem in Regem pater coronaverat, eadem de causa Philippo Flandriæ Comiti, Cantii etiam titulum adjunxit, cum res novas in patrem molire-

tur, sed hic tantum titulo, & promisso tenus Cantii Comes erat. Ut enim habet Gervasius Dorobernensis: *Comes Flandria Philippus suum pro posse sponndit auxilium juveni Regi, faciens homagium cum juramento. Cui pro servitio suo promisit Rex cum toto Cantio, 1000 librarum redditus, Castellum quoque de Roffa, cum Castello de Doveria.* Non longo post tempore Hubertus de Burgo optime de Repub. meritis, suo quasi merito eundem honorem ab Henrico III accepit, vir patriæ vere amans, & qui omnia officia, quæ à cive optimo patria exigere possit, inter medias adversantis fortunæ procellas cumulate præstitit; honore tamen exutus diem obiit: jacuitque hic titulus usque ad Edwardi II tempora. Ille enim fratri suo juniori Edmundo de *Woodstock* contulit, qui nepotis sui Edwardi III tutor, falsæ & iniquæ invidiæ tempestatem subiit, securi percussus, quod in fratrem depositum, fraternum animum nunquam obscure tulerit, & illum jam è medio sublatus, (quod tamen illi omnino ignotum) è custodia liberare cogitaverit. Filii tamen duo Edmundus & Ioannes successerunt suo ordine, quibus sine sobole mortuis, hunc honorem eorum soror, ob venustatem dicta *The faire maide of Kent*, superstes, in equestrem *Holandorum* familiam transtulit: Thomas enim *Holand* ejus maritus dictus erat Cantii Comes, quem eo honore sequutus est Thomas ejus filius, qui obiit anno vicefimo Rich. Secundi, cui successerunt bini ejus filii, Thomas, qui Dux Surriæ creatus, statimque dum res novas in Regem Henricum Quartum moliretur, obtruncatus; & post eum Edmundus, qui Angliæ Archithalassus, dum *Fanum Brioci* in Britannia Armorica oppugnaret, accepto vulnere, anno salutis M C C C C V I I I occubuit. In his cum hæc dignitas exacta periodo intercidisset, patrimonio inter sorores diviso, Rex Edwardus IIII, primùm Guilielmum *Nevill* Dominum de *Fauconberg*; eoque extincto, Edmundum *Grey* Dominum de *Hastings*, *WVestford*, & *Ruthyn* Cantiani Comitis titulo adauxit, qui Georgium filium successorem habuit. Ille ex Anna *WVidevile* conjugæ prima Richardum Comitem Cantii progeniit, qui sine sobole diem clausit cum hæreditatem profudisset; ex secunda autem uxore Catharina filia Guilielmi Herberti Comitis Penbrochiæ Henricum *Grey* Equitem suscepit, cujus è filio Henrico nepos Reginaldus in Comitem Cantii à Regina ELIZABETHA Anno M D L X X I I erectus erat. Illique sine prole defuncto Henricus ejus frater successit, omnibus veræ nobilitatis ornamentis vir longe honoratissimus.

Anno E. 2.
15.

S. Bricu.
Tho. Walsingham.

Habet hæc provincia paræcias 398.